

Minister Oduber ta splica dicon importacion:

“Aruba mes ta produci menos cu 1% di e consumo di fruta y berdura”



ORANJESTAD – Despues di anuncia cu Aruba lo haya mas fruta y berdura di Republica Dominicana, minister Otmar Oduber ta splica dicon gobierno ta pro e importacion aki.

Ayera minister Otmar Oduber a regresa di e mision economico na Republica

Dominicana organisa pa Embahada Hulandes na dicho pais Caribeño. El a papia di e fruta y berdura, unda e ta splica cu Aruba ta produci menos cu 1% di e consumo di fruta y berdura na nos isla. Durante e encuentro e mandatario a mostra e empresarionan presente e calidad di turista cu nos isla ta ricibi y

ta atrae, e grado di ocupacion y e mas di 1 miyon bishitante sin conta e turistanan crucero.

E cifranan aki ta pa ilustra cu pa aña ta bay entre 500 pa 700 container di 40 pia di fruta y berdura cu ta keda consumi. Pa añanan largo Aruba a importa su fruta y berduranan specialmente for di Venezuela, cual no ta e caso mas.

Importa mas lihe Minister Oduber tabata mira e diferente opcionnan cu tabatin y Re-

publica Dominicana semper tabata un di e principalnan, pero tabatin semper dos preocupacion grandi. Despues di su biahe, e ta sinti cu e preocupacionnan aki a wordo hala un banda. Un di nan tabata e hecho cu transporte marítimo no tabata existi, pa por a yega Aruba for di Republica

Dominicana tabata tarda entre 10 pa 16 dia y e otro tabata cu no tabatin consistencia riba e carga importa (calidad y cantidad).

E mandatario ta expresa cu nos ta custuma na e momentonan aki cu fruta y berdura di calidad halto. “Nos tin un industria turistico y un comunidad cu hopi a wordo haci riba dje pa por fomenta e comemento saludabel, sin embargo ora bo mira e prijs di fruta y berdura, e ta pone cu practicamente hende no ta ni consumi nan.”

E ta agrega cu na e momentonan aki e costo nan ta wordo calcula cu nan ta entre 300 pa 400% mas caro cu loke nan lo mester ta si por haya importacion directo for di paisnan productor sin tin tur e mediador cu ta aumenta e prijsnan.

Convenio

E preocupacionnan existente awor a keda tras di lomba. Awor tin un compania Hulandes cu 3 luna pasa a cuminsa nabega for di Hulanda y ta pasa Republica Dominicana, Aruba, Bonaire, Cor-

sou y ta bay te Colombia pa bolbe Hulanda, e minister ta informa.

Despues di e encuentronan e siman aki, a yega na un convenio cu e barco lo ta biahando for di Republica Dominicana pa Aruba semanalmente y e lo ta den 3 dia na nos isla, cual ta algo ‘sumamente positivo’, segun e minister pa por haya e fruta y berdura na e miho calidad cu ta posibel.

Tambe minister Oduber a indica cu el a reuni cu su homologo Dominicano cu ta sali for di e mundo di agricultura y e pais ta cumpliendo cu normanan internacional cu ta drentando Merca cu produccion di calidad halto. Asina aki tambe ta segura e calidad di fruta y berdura pa nos isla. Pues e minister ta conclui cu tur esaki ta beneficioso pa ambos pais.

Riba e critica di e cunukeronan locual, e minister ainda no a reacciona. Por lesa e critica aki riba pagina A2. Y tambe un reaccion di banda di e consul Dominicana riba e mision economico riba pagina A8 den e edicion aki. □